



Adresa: **Ul. Hamdije Čemerlića 39a**  
71000 Sarajevo  
<http://www.voda.ba>

tel. +387 33 726 412  
fax. +387 33 726 414  
e – mail: [info@voda.ba](mailto:info@voda.ba)

Broj: **UP-1/21-1-40-326-4/22**

Datum: **08.07.2022. godine**

«Agencija za vodno područje rijeke Save» Sarajevo rješavajući po zahtjevu «Agencije za vodno područje rijeke Save» Sarajevo podnesenom putem „Sektora za realizaciju investicionih projekata” za izdavanje prethodne vodne saglasnosti za čišćenje korita i uređenje erodabilnih obala rijeke Bosne na području općine Ilijaš, na pet lokaliteta, na osnovu člana 109. stav (1) tačka 14. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98 i 49/99), **donosi**

### **RJEŠENJE** **o prethodnoj vodnoj saglasnosti**

1. Investitoru, «Agenciji za vodno područje rijeke Save» Sarajevo daje se prethodna vodna saglasnost za čišćenje korita i uređenje erodabilnih obala rijeke Bosne, na pet lokaliteta i to: Kadarići, Donja Luka, Gornja Luka, Ribarići i Malešići, na području općine Ilijaš, u postupku pribavljanja urbanističke saglasnosti.
2. Prethodna vodna saglasnost se daje na osnovu pregleda dokumentacije dostavljene uz zahtjev i pod slijedećim uslovima:
  - 2.1. Izraditi i revidovati investiciono - tehničku dokumentaciju na nivou potrebnom za pribavljanje odobrenja za građenje u skladu sa propisima koji važe za ovu vrstu radova, a koja treba da je urađena od strane ovlaštenog pravnog lica u skladu sa odredbama Pravilnika o uvjetima i kriterijima koje mora ispunjavati pravno lice za izradu dokumentacije na osnovu koje se izdaju vodni akti („Službene novine Federacije BiH”, broj 17/08 i 38/12).
  - 2.2. Projektnom dokumentacijom treba da se obuhvati tehničko rješenje zaštite erodabilnih obala korita (konkavne krivine) i čišćenje korita u cilju obezbjeđenja proticajnog profila rijeke Bosne, a projekat između ostalog treba sadržavati:
    - Situativni prikaz sa ucrtanim dionicama obuhvaćenim aktivnostima čišćenja korita i uređenja obala rijeke Bosne na ažurnim geodetskim podlogama kao i uzdužnim i poprečnim profilima riječnog korita urađenim na bazi geodetskih snimanja, koja će se provesti za potrebe izrade ove projektne dokumentacije. Snimanje izvesti preko operativnog poligonog vlaka uz povezivanje sa državnim nivelmanom sa osiguranjem krajnjih tačaka poprečnih profila na terenu trajnim biljegama (uz položajni opis i nacrt), preko kojih će se vršiti kontrola realizacije ovih radova.
    - Tehnički opis uz obrazloženje rješenja i pojašnjenje efekata izgradnje zaštitnih objekata, dimenzioniranje obloge konkavnih krivina rijeke Bosne, predmjer radova, tehničke uslove izvođenja i odgovarajuće grafičke priloge uobičajene za nivo projekta za građenje sa ciljem uređenja i sprečavanja dalje devastacije obala rijeke Bosne.
    - Rješenje kojim će se očistiti i urediti korito rijeke Bosne na navedenim dionicama u cilju stabilizacije obala, korita i smanjenje rizika od štetnog djelovanja voda na predmetno područje;
    - Zahvati na čišćenju korita i sanaciji obala korita moraju uvažiti postojeće imovinsko - pravne odnose i radove svesti u pojas kojim će se najmanje narušiti privatni posjedi i parcele;
    - Predmjerom radova utvrditi količine materijala (pijesak, šljunak) koje će se izvaditi iz ada/sprudišta, a koji se može iskoristiti za radove na uređenju korita i obala rijeke Bosne, te materijala koji treba ukloniti (smeće, mulj, kruti otpad, pijesak, šljunak, šibljie i dr). Bilans masa uraditi na osnovu ažurnih geodetskih podloga;
    - Zahvati uređenja korita trebaju se uklopiti u postojeći ambijent sa minimalnim narušavanjem prirodnog stanja koristeći u rješenju prirodne materijale;
    - Trebaju se uvažiti zahtjevi predstavnika lokalne jedinice samouprave u dijelu koji se odnosi na uklaapanje u urbanističku i prostorno – plansku dokumentaciju;

- Prilikom definiranja načina izvođenja radova na utvrđenim lokalitetima sa oštećenjima obale korita uvažiti postojeće stanje korita, morfologiju terena, geološki sastav korita i slično.

Projektna dokumentacija treba da bude urađena na zakonski zahtijevanom nivou za ovu vrstu radova i sadrži sve opće i tehničke elemente propisane zakonodavstvom iz ove oblasti.

3. Materijal koji ima svoju upotrebnu i tržišnu vrijednost i koji se može dalje koristiti (pijesak, šljunak) koji će se pojaviti kod čišćenja korita rijeke Bosne i čije će se količine utvrditi u predmjeru radova iz tačke 2.2. alineja 5. ovog dispozitiva, a koji neće biti relociran (ugrađen) u toku izvođenja ovih zahvata na uređenju korita, treba obuhvatiti Ugovorom u skladu sa odredbama člana 19. stav (2) i (3) Uredbe o načinu dodjele prava za vađenje materijala iz vodotoka («Službene novine FBiH», broj 58/15).
4. Po izradi dokumentacije iz tačke 2.1. dispozitiva ovog Rješenja, nosilac prava iz prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti. Zahtjev za izdavanje vodne saglasnosti dostavlja se u skladu sa članom 8. i 19. Pravilnika o sadržaju, obliku, uslovima, načinu izdavanja i čuvanja vodnih akata.  
Uz zahtjev se, između ostalog, prilaže:
  - Investiciono - tehnička dokumentacija zahtijevana tačkom 2.1. ovog Rješenja,
  - Rješenje o urbanističkoj saglasnosti i okolinskoj dozvoli (ukoliko predmetna aktivnost podliježe obavezi pribavljanja iste) za predmetnu dionicu uređenja rijeke i dokaz o riješenim imovinsko – pravnim odnosima,
  - Saglasnost udruženja sportskih ribolovaca na termine provođenja radova na predmetnom uređenju korita rijeke Bosne.
5. Ukoliko nakon izdavanja prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, u roku utvrđenom u članu 111. stav 3. Zakona, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavjestiti ovu agenciju, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
6. Ovu prethodnu vodnu saglasnost će Investitor koristiti u postupku dobijanja urbanističke saglasnosti i okolinske dozvole ukoliko ova vrsta radova podliježe obavezi ishodovanja istih i ona definiše uslove koje projektna dokumentacija treba zadovoljiti sa aspekta voda u skladu sa Zakonom o vodama u postupku dobijanja vodne saglasnosti.
7. Prethodna vodna saglasnost se daje sa rokom važenja od tri (3) godine od dana pravosnažnosti ovog rješenja.

## **O B R A Z L O Ž E N J E**

Investitor, «Agencija za vodno područje rijeke Save» Sarajevo, putem "Sektora za realizaciju investicionih projekata" Agencije je podnio zahtjev za izdavanje prethodne vodne saglasnosti za uređenje erodabilnih obala i čišćenje korita u cilju obezbjeđenja proticajnog profila korita rijeke Bosne, na pet lokaliteta i to: Kadarići, Donja Luka, Gornja Luka, Ribarići i Malešići, na području općine Ilijaš.

Uz zahtjev je dostavljena i pregledana slijedeća dokumentacija:

- Kopija Aktuelnog izvoda iz sudskog registra Općinskog suda u Sarajevu, broj: 065-0-RegZ-14-002716 od 21.04.2014. godine izdato od strane Općinskog suda u Sarajevu,
- Kopija obavještenja o razvrstavanju pravnog lica prema klasifikaciji djelatnosti, broj: 07-32.5-45391/12 od 11.12.2012. godine, služba za statistiku za područje Kantona Sarajevo,
- Kopija uvjerenja o poreznoj registraciji, Porezna uprava FBiH - Kantonalni porezni ured Sarajevo, od 14.12.2012,
- „Elaborat obezbjeđenja proticajnog profila rijeke Bosne u općini Ilijaš na lokalitetima Kadarići, Donja Luka, Gornja Luka, Ribarići i Malešići“, urađen od strane „ES HYDROTECHNICS“ d.o.o. Sarajevo, april 2022. godine.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i člana 21. Pravilnika o sadržaju, obliku, uslovima, načinu izdavanja i čuvanja vodnih akata o zahtjevu je dana 01.07.2022. godine obaviještena javnost putem obavještenja na oglasnoj ploči «Agencije za vodno područje rijeke Save» Sarajevo i u dnevnim novinama „OSLOBOĐENJE“. U datom roku nije bilo pisanih izjašnjenja o predloženim aktivnostima iz zahtjeva.

U provedenom postupku konstatovano je slijedeće:

Navedena aktivnost je inicirana od strane nadležnih organa i nakon provedene procedure planirano je da se ista uvrsti kroz rebalans Plana i finansijskog plana za 2022. godinu AVP Sava.

Čišćenje i uređenje korita rijeke Bosne na području općine Ilijaš planirano je u cilju povećanja protočnog kapaciteta korita i stabilizacije oštećenih obala korita uslijed erodabilnih procesa i odnošenja materijala. Na pet lokaliteta su identificirani kritične dionice gdje je potrebno korito pročititi i eventualno predvidjeti osiguranje obale (adekvatnom oblogom kosina na potrebnoj dužini), tj. istu stabilizirati i zaštititi od štetnog djelovanja voda. Čišćenje ove dionice od naplavina će se provesti u cilju poboljšanja hidrodinamičkih uslova i poboljšanja kapacitivnih karakteristika korita. Rang zaštite od velikih voda nije definiran i cilj ovih zahvata je smanjenje opasnosti od poplava okolnog područja i održavanje korita.

Prema dostavljenom Elaboratu, na predmetnoj dionici vodotoka treba ukloniti približno 40.490 m<sup>3</sup> materijala iskopom nanosa odnosno uređenjem korita, ukloniti šibljice i nisko rastinje na površini približno 31.365 m<sup>2</sup>, odnosno provesti aktivnosti na održavanju prirodnog vodotoka kako je propisano članom 81. stav (1) Zakona o vodama. Sticanje prava na daljnje korištenje upotrebljivog materijala koji će se pojaviti u sklopu ovih aktivnosti regulisati u skladu sa Uredbom o načinu dodjele prava za vađenje materijala iz vodotoka.

Na osnovu priložene tehničke dokumentacije utvrđeno je da se u svrhu poboljšanja hidromorfološkog stanja vodotoka, dinamike prirodnog procesa tečenja i smanjenja opasnosti od nastanka šteta od poplava i šteta nastalih erozionim procesima na predmetnoj dionici, na osnovu člana 109. stav (1) tačka 14., a u vezi sa članom 111. Zakona o vodama («Službene novine FBiH», broj 70/06) i člana 17., stav (1), tačka 13. Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH» broj 31/15, 55/19 i 41/20), valjalo rješiti kao u dispozitivu ovog rješenja.

#### **UPUTA O PRAVNOM LIJEKU:**

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.


Voditelj postupka

Nihad Pezo, dipl.inž.građ.

Prilog:

„Elaborat obezbjeđenja proticajnog profila rijeke Bosne u općini Ilijaš na lokalitetima Kadarići, Donja Luka, Gornja Luka, Ribarići i Malešići“, decembar 2018. godine.

**Po ovlaštenju**  
**Rukovodilac sektora za izdavanje**  
**vodnih akata**

  
**Hariš Ališehović, dipl.inž.građ.**

Dostaviti:

- «Agencija za vodno područje rijeke Save», Sektor 30 (Prilog);
- ⊖ AVP Sava, ISV-vodna knjiga – ovdje;
- Arhiva – ovdje;
- AVP Sava – Oglasna ploča